

《結》

黃玉梅

角色：

- 1.老婆婆（辛婆婆）
- 2.生果店老細（勞為財）
- 3.老闆妹妹（勞善情）

第一幕

時間：農曆新年前幾天的一個傍晚時候

地點：擺滿賀年貨品的街道

店主甲：（聲嘶力竭地叫賣）家鄉特製年糕，蘿蔔糕，足料做架……喂，太太，買返底過年食啦，包保多臘肉同蝦米呀！

太太甲：（左望望右望望）又好似幾好咁嚟，幾錢底呀？

店主甲：（笑容滿臉）見呢位太太咁靚就平 d \$ 1 8 底比你啦！十八實發取個好意頭過新年呀。

太太甲：（高興得笑了出來）呀，好啦，見你把口咁識講野，要一底年糕同蘿蔔糕啦！

（這時候辛婆婆手拿一破舊的紅白藍細麻袋出現）

店主甲：（一邊把年糕和蘿蔔糕入起來，一邊問老婆婆）婆婆有咩要呀？d 年糕家鄉特製架，買底過年食啦！\$ 1 8 比你啦！

辛婆婆：（猶豫了一會）十八蚊呀……我……我……無錢呀……老細，可唔可以當係施捨比我呀？

店主甲：（立即180度變臉，粗聲粗氣地）阿婆，無錢就過主啦，新年就到，施捨？我彩，大吉利事！過主！過主！

辛婆婆：（哀求語調）老細，好心施捨下啦，阿婆好多日無食野啦……做好心必得好報架！新一年生意必定滾滾來，小財出就大財入丫o麻，老細，唔該你丫！

店主甲：（不奈煩的樣子）走啦，阿婆，無呀無呀！唔好阻住我做生意發財啦！快d行開啦！

（辛婆婆只好離開，朝另一間鋪的方向一拐一拐的行）

（行到不遠處，有一間生果店的門口放滿花牌，辛婆婆停下來）

勞為財：新將期內水果特平呀！快d買啦喂！

辛婆婆：老細，請問……請問你d……

勞為財：點呀？想要咩水果呀？好平好平！全部都新鮮架，今朝先運到

辛婆婆：唔係呀唔係呀，我唔係想買水果，我想問你花牌d花同個d紙皮箱要唔要，可唔可以比我呀？

勞為財：cher！唔係買生果就行開咪阻住曬啦，阿婆～咩唔要呀！咩都要呀！我擺到d花謝曬先掉呀！d箱我用o黎裝野呀！

辛婆婆：比一我都得架啦，我唔係要曬架……勞為財：無呀無呀！搞搞震，無幫襯！

（婆婆只好走開了）

勞為財：（自言自語地）都傻o既，d花牌係人地送比我開將，唔係用o黎做善事架……個老太婆，你方我唔知你想點呀，想拎去買？！哼，借我o黎發財呀！你就想！

站在旁的幾個工人竊竊私語：嘩，呢個老細丫，估唔到佢咁無情心架wor

勞為財：（隱約地聽到好像在說他什麼的，便大聲喝道）你地幾個講咩呀？仲唔做野？！第一日返工係咪想搏炒呀？

（到夜晚大約8時，勞為財與其他工人一起準備收鋪）

勞為財：（大聲地）喂，你地呀，快d幫手執返d貨放好佢呀，小心d呀，唔好跌爛d生果呀，跌爛你地就要幫我買左佢呀！

工人甲：（悄悄地向工人乙說）呢個勞老細真係丫，賺佢少少錢就使人唔使本咁……工人乙：（嘆息地）唉……係咁架啦，鬼叫佢係你老細咩！你又要靠佢先有飯食噃！總之就小心d啦！

（然後又繼續搬野，勞為財則企係一旁觀察工人的工作）

（數分鐘後）

勞為財：（對正有搬貨的工人呼喝）喂，你地呀，搬得咁慢架！快d啦，一陣出去去掉埋d花牌佢呀，阻住曬個門口，想放多d生果賣都唔得，累我搵少左錢……（不忘補上）仲有呀，記得要折斷左先掉呀，唔好比我知道你地無折斷就掉呀！

工人甲：（一路搬貨，一路埋怨地問工人乙）點解好地地要正斷d花呀，就咁掉唔得咩？！又要人做多d功夫

工人乙：（一邊搬，一邊笑著說）勞老細怕人佔佢便宜呀！你唔記得今日個o個爛身爛世o既阿婆咩？！

工人甲：（恍然大悟似的）哦！你係話想要d花牌o個個阿婆呀！

工人乙：係呀！

工人甲：好心佢啦～唔要就比阿婆啦，個阿婆咁慘……

工人乙：呀——（隨即手上的那盒水果跌了落地，“嘑”的一聲）

工人甲：（驚慌地問乙）做咩呀你？

工人乙：（臉色嚇得都變青了）死啦今次！

勞為財：（立即走過來，滿有怒氣的）你地 2 個呀，做咩呀！顧住傾計，依家仲要跌埋 d 貨落地，我請你地返 o 黎唔係傾計八卦架，呢次 d 生果實比你跌爛曬啦！仲唔快 d 打開佢睇下！爛左幾多就係你地人工度扣返幾多出 o 黎！

（工人甲和乙立即執拾好地上的生果）

工人甲：（悄悄地對乙說）今次你都好彩啦，佢唔炒你，下次醒目 d 呀！

（生果店關門後，生果店後巷）

（當工人甲和工人乙正在折花時，婆婆又出現係後巷）

辛婆婆：（有點害怕）請……請問，d 花同個 d 紙皮箱仲要唔要架？

工人乙：哦，唔要架啦～

辛婆婆：咁我可唔可以拎走呀？

工人乙：咁呀……

工人甲：不過呢 d 已經正斷曬啦，個度仲有 2 個花牌，你拎個 d 啦～

辛婆婆：好呀好呀，多謝你呀！多謝你呀！

工人乙：（係工人甲耳邊細語）你想死呀，勞老細話唔比佢拎架，要我地正斷曬 d 花先掉得，你博比人炒咩！

工人甲：老細依家又唔係度，叫佢快手 d 咪得 l o r 反正都掉，比佢有咩所謂啫

（向阿婆細聲說）你要快 d 拎呀，唔係一陣老細知道，我就死架啦

辛婆婆：唔該你呀後生仔，真係唔該你呀！

（當老婆婆正在取花時，老細的妹妹勞善情突然走到來後巷）

勞善情：（望向老婆婆）婆婆你係度做咩呀？

辛婆婆：……工人乙：（立即向她解釋）老闆娘，對唔住呀對唔住呀，我地諗住 d 花反正都唔要，咪幫下阿婆 l o r ~ 千祈唔好話比勞生知呀！佢唔比我地咁做架，佢要我地折曬 d 花先掉的……老闆娘，求下你丫，唔好同勞生講呀，我仲有幾個仔女要供書教學架……

勞善情：你唔使咁緊張，我又無話要話比阿哥知，做咩阿哥要你地正斷 d 花先掉架！咁都有 o 既，反正都唔要，咪比阿婆拎走 l o r ~

工人甲：老細怕人佔佢便~~~宜~~~呀（說時比工人乙阻止）

工人乙：唔……唔……唔係……呀……老闆娘，無無無，佢講錯野 j a !

勞善情：（驚訝）唔係 g w a ，只不過係幾個紙箱啫，阿哥唔會咁 g w a !

工人乙：係呀係呀，老闆娘，佢講錯野咋，無呀無呀！

勞善情：（對工人甲乙說）得啦，咁你地快 d 執埋 d 野就收工啦，都好夜了（又對辛婆婆說）婆婆，d 花同紙箱都唔要架啦，你要 o 既可以拎架，我地鋪每日都有好多紙箱，你想要就 o 黎睇下有無啦！

辛婆婆：多謝你呀！老闆娘！

勞善情：唔係多謝，反正我地又無用 o 既！

（走進鋪中，勞善情見勞為財正在執拾剛才跌爛的生果）

勞善情：阿哥，你又執返 d 爛生果返屋企食呀？

勞為財：（邊執邊答）頭先叫 d 人搬貨，真係識食唔識做呀！正一就有破壞無建設，跌爛曬我 d 生果，要錢買返 o 黎架嘛，梗係執返去食啦！

勞善情：你依家又唔係無得食，d 生果都跌到又爛又污糟，就唔好要啦，一陣食左有病呀！

勞為財：（繼續執）搵錢好辛苦架，唔怕啦，我身體咁健康，食得唔好曬呀！係呢，阿妹，咁好落 o 黎鋪頭，唔使返工咩？

勞善情：今日年廿八公司比我地放早，咪落 o 黎睇下有咩幫下手 l o r ！

勞為財：呢度有工人幫手得架啦，廢事整污糟你 d 衫啦，阿妹，你睇下，今日生意好好呢，d 貨今朝先入，都賣得七七八八呀。

勞善情：係呀～咁咪好 l o r ！係呀，哥，頭先有個老婆婆 o 黎想要 d 紙皮箱同花，我叫佢拎去呀，反正我地又唔要 o 既

勞為財：（開始有 d 氣忿）又係個 o 個呀婆呀，晏晝個時咪話過唔比佢 l o r ，又 o 黎問，佢咁厚臉皮架！

勞善情：哥，仲有幾日就新年啦，個婆婆如果真係有 d 錢 o 既，都唔使咁走出 o 黎，問你要 d 拎去賣啦！我聽 d 街坊講，個婆婆好似叫辛婆婆，佢好慘架，成日都係買個 d 無人會買 o 既菜同生果食。

勞為財：個阿婆想拎去賣，我先唔會咁益佢呀！

勞善情：阿哥，我仲以為 d 工人真係講錯野，估唔到你真係咁無同情心架！

勞為財：阿妹，我唔係無同情心呀，而係做人咁好心唔會有好報架，你記唔記得我地細個 o 個時，d 人點對我地呀！

勞善情：我記得，但係你唔可以一竹筏打沉曬成船人架 m a ！

勞為財：我地個時餓左幾日都無食過野，後尾見人地間包店夜晚掉麵包，諗住執 o 黎食啦，個阿孀又咪無同情過我地！我地已經唔係奢求要 d 新鮮好食 o 既包，佢連自己本來唔要 o 既包都唔肯比我地執呀！仲要趕走我地，特登整烏“遭”曬 d 包佢，呢 d 先係無同情心呀！

勞善情：（有點不快的）就算係，都唔代表全世界 o 既人都係咁，亦唔等於你可以用同樣態度對人的！

勞為財：由個時開始，我只係知道要係呢舍 世界生存，就要學識弱強食的道理，對人仁慈即係對自己殘忍！

勞善情：如果人人都係咁諗，呢個世界就唔會再有光明架啦！再者，你點可以將自己 o 既不幸，報復係個 o 個婆婆身上架，太殘忍了！

勞為財：算啦算啦，我地唔好再討論呢件事啦，唔想因為 d 咁 o 既人而傷我地兄妹和氣呀！唔拎都拎左，總之下次我唔會再做好心的，你叫佢下次唔好再 o 黎呀！

勞善情：哥呀，你仲係唔明架！

第二幕

時間：第 2 日早上

地點：生果店

（勞為財剛開鋪時，看見辛婆婆拎住厚厚的紙皮從鋪頭後門走出來）

勞為財：（立即冒起火）你個老太婆真係丫！又 o 黎我鋪頭偷野去賣呀？可惡呀！我依家就踩爛曬佢，睇你點拎去賣！

辛婆婆：（語帶悲傷）唔係呀，係老闆娘尋日話比我拎架……

（這個時候，周圍鋪的人和街上的行人都在圍觀，勞善情剛經過此處，欲去生果店）

勞善情：（激動）阿哥，你做咩踩爛辛婆婆 d 野呀？

勞為財：（氣忿）尋日唔比佢拎，佢今日都竟然 o 黎偷，唔叫警察拉佢咪算好彩 l o r ！

勞善情：係我尋日話比佢拎架！反正我地都無用，做咩唔幫下辛婆婆呢！

勞為財：d 野係我，我話唔比就唔比！

辛婆婆：老闆娘，算啦算啦！唔好為我再嘈了。

旁觀者甲：呢個老細真係丫，自己唔要都唔比阿婆，咁鬼自私架！

旁觀者乙：咪係囉！呢個名婆真係好慘架！我成日都見到佢周圍執舊報紙，紙

皮比人回收，真係陰公了！

旁觀者丙：好心個老細啦，自己有鋪頭就話唔憂三餐啫，人地阿婆又無人無物，又無咩收入，紙皮啫，咪比人當做善事囉！

勞為財：（聽到周圍人的談論，心感不憤）講咩呀你地班師奶，講得咁好聽，你地又唔比D錢幫下佢，淨係識得係到講是講非。

（一眾師奶聽後即時停了口，然後若無其事的走開）

勞為財：（警告語氣對老浪浪說）你呀，唔好再比我見到你o黎拎紙皮呀！今次……今次我就算呀，快d拎埋d野走，唔好阻住我做生意。

（勞善情不理她的哥，幫辛婆婆執拾地上的紙皮）

勞善情：（感到慚愧）對唔住呀，辛婆婆，我哥哥咁對你，仲講左d咁難聽o既說話。

辛婆婆：（臉強帶笑容）唔緊要，你唔使道歉架，老闆娘。

勞善情：係呢，辛婆婆，你食左早餐未呀，不如我請你食早餐，當係代我阿哥賠罪丫。

辛婆婆：其實真係唔緊要架，老闆娘，你阿哥幫我係人情，唔幫我係道理，你真係唔使咁介意，反而我搞到你兩兄妹無啦啦有爭執，我覺得唔好意思就真！

勞善情：（微笑地）算啦算啦，我地都唔好再自責啦，去食d野啦，反正我又未食野，辛婆婆，你當陪我啦，好無呀？

辛婆婆：（摸一摸自己的衣袋，正想婉拒她）都係唔……

勞善情：（搶著說）辛婆婆，唔使擔心啦，我請你！

（辛婆婆亦不好意思再拒絕了）

第三幕

時間：同上

地點：茶樓的街上

勞善情：（一路走一路說）唔知點解我覺得同你好似似曾相識咁。

辛婆婆：我d親人都唔係度l o r，朋友又無咩人有女兒，應該唔會識得o 既

勞善情：哦，不過總係有呢種感覺，可能係自小無左媽媽，想有個年紀大d

o 既女性陪下我g w a！

辛婆婆：（臉帶憐惜）哦……原來係咁。

勞善情：我地自小就係孤兒，兩兄妹相依唯命，都慣左l u～所以阿哥好踢我架，細個個時，我地成日都無野食，一有得食，阿哥實分多d比我架。係呢，我地食咩好呀？

辛婆婆：阿婆食咩都無所謂。

勞善情：丫！一係我帶你去飲早茶丫，個間茶樓d野都幾好食架，我同阿哥成日都去個度飲茶架！

（到達茶樓門口，辛婆婆呆呆的望著鄰家的店舖）

勞善情：辛婆婆，你無野丫嘛，做咩定曬神o 既，我地入去吧！

辛婆婆：哦，無事無事，我地入去啦

（坐下後）

辛婆婆：（不禁懷念起往時的事來）頭先個間鋪係十年前係間麵包店，都幾多人幫襯架！

勞善情：（好奇地問）辛婆婆，你又知o 既，你以前都係住呢頭架？

辛婆婆：係呀，間麵包店仲係我同我個死鬼老公開 o 既，不過十年前執左了。

勞善情：好地地執左？

辛婆婆：（嘆息道）都唔知 l o r 可能係個心對住 d 麵包就唔舒服啦！

勞善情：下？點解呀？

辛婆婆：（內疚地）都係自己衰啦！

勞善情：點解呀，辛婆婆？件事好似好嚴重咁？

辛婆婆：唉～個時我就好似你阿哥對我咁對人。

勞善情：你意思係～～係咪指對人好刻薄呀？

辛婆婆：我諗可能我仲衰過你阿哥。

勞善情：但我覺得你唔似 w o r 辛婆婆，點解你咁講呀？

辛婆婆：有一件事一直都令我好內疚的。

勞善情：係咩事呀？可唔可以講比我知架？

辛婆婆：（遲疑了一會）可以，不過你聽完都一定會覺得我好衰，係咁 o 既，大約十年前有一晚，有對年紀好細的兄妹 o 黎問我拎麵包，雖然個時我同老公係度收緊鋪，又準備掉麵包，但我唔想比 d 麵包佢地，因為比得一個就會有好多入問，咁我仲使做生意咩，個個夜晚都 o 黎執麵包啦。

勞善情：之後呢？

辛婆婆：個時我老公都有叫我做下好心，可憐下個 2 個細路，但我個時我又唔肯……

勞善情：咁最終你有無比呀？

辛婆婆：最後，我將 d 麵包倒曬落個垃圾桶度，d 麵包都比其他垃圾整污糟曬。

勞善情：（心中有點怒意，卻要扮作若無其事的問）咁個兩兄妹後尾點呀？

辛婆婆：（眼有淚光）個晚，我記得都幾凍架，所以我同我老公都趕返屋企，無理個2兄妹，我諗佢地可能會去問其他人攞野食啦。點知，第2日我睇報紙話佢地凍死左係街度……最衰都係我……如果唔係佢地就唔會……（辛婆婆嗚嗚地哭，勞善情知道婆婆所講的正係當年佢和哥哥所遇的，而婆婆竟一直以為他們二人已經死了）

勞善情：咁呢件事關你執左間鋪架咩事呀??

辛婆婆：自從個次後我每次返到麵包鋪就會諗起自己點對個2兄妹，有時見到d細路仔入o黎我度買麵包，就好似見到個2兄妹入o黎問我執麵包的情景，我就會連夾起個麵包都唔敢，有時對住d麵包仲會覺得陰陰寒寒咁，我成日覺得個2兄妹好似係我左右咁，我唔知可以點，唯有咁執左間鋪，先可以無左呢d感覺。

勞善情：（聽至此不忍再怪婆婆當日對她和哥哥所做的事）辛婆婆，其實個兩兄妹係……（呢個時候，茶樓侍應送上熱烘烘的茶和水，被後面兩個正在追逐的小孩撞到了手，滾茶隨即倒在婆婆的手上）

辛婆婆：（痛楚的）哎呀，好痛呀！

勞善情：（緊張的）辛婆婆，你有無事呀？（立即用枱布替辛婆婆抹）點呀？辛婆婆，仲痛唔痛呀？（又責罵那個不小心的侍應）你點搞架，咁唔小心都有架，老人家o黎架！

辛婆婆：無咩，係酌傷下，應該無咩，你唔好話佢啦！

侍應：（戰戰兢兢地）對……對……對唔住呀，婆婆，你……你有……有無事……事呀？

（後面枱那兩個闖了禍的小孩的媽媽立即拉她的兩個孩子回位，扮作不關好孩子的事，如常地飲茶食點心）

勞善情：（擔心的）辛婆婆，你隻手紅曬啦！不如我送你去醫院睇下啦！

辛婆婆：（立即拒絕）唔使唔使，好少事啫，唔使去醫院啦！

勞善情：咁唔去醫院，不如 o 黎我哥鋪頭度丫，個度有 d 紗布藥膏，我幫你清洗下再包扎丫。

辛婆婆：（有 d 不願意）但，你哥哥……對我……你唔怕佢又話你咩？

勞善情：（緊張地）辛婆婆呀，依家你隻手酌傷左紅曬呀！唔使理佢咁多啦！

辛婆婆：咁呀！

勞善情：有我係度丫嘛！

第四幕

時間：同上

地點：生果店

（返到生果店，阿情正在為婆婆包扎她的手）

勞為財：（一踏進鋪，看見妹妹，笑臉盈盈的）阿情～（隨即見到坐在情隔離的辛婆婆，臉即時黑起來）做咩個老太婆又係度架！？

（店內各人一聽到，都立即停下手上工作，望向勞為財那處）

勞善情：（不滿其兄對婆婆的態度）哥呀，頭先我同辛婆婆去飲茶個時，佢比熱水酌傷左，我咪帶佢返 o 黎包扎 l o r ！

勞為財：你理個阿婆咁多做咩呀！你同佢有親咩？！

勞善情：（開始有點激動）哥呀，你對辛婆婆 d 態度好少少，得唔得呀？！

（有些工人在一旁竊竊私語：

工人甲：喂喂，老細又係度話上次個阿婆呀！

工人乙：係w o r，呢個老細真係幾無同情心架b o r。

工人甲：我都覺，不過老闆娘就唔同啦。

勞為財：（聽到工人們在討論似的，感到有點羞愧）你地講咩呀，唔關事o既就去做野（向其妹，有點失望地道）由細到大，你都未試過咁同我講野，你依家為個阿婆而同d咁o既態度！

勞善情：（激動地）婆婆因為我地兩個要執左自己間鋪。（勞善情知道自己一時激動講了事實出來）

辛婆婆：（驚訝的）老闆娘，你講咩話，即係你地兩個就係當日個兩兄妹？

勞善情：係呀，辛婆婆～其實後尾有個好心人比左d飯我地食，我地無餓死到呀。（向其兄道）辛婆婆就係以為我地死左，一直以來佢地好自責呀，仲因為咁執左間麵包店，過住d三餐都唔得溫飽o既生活。

勞為財：（搶了過去說）咁你仲理佢咁多做咩呀！呢d係佢o既報應啦！既然當日佢都無同情過我地，今日我地又使咩同情佢丫！

勞善情：都咁多年啦，佢都已經得到應得o既報應啦，依家佢無人無物，我地生活又過得去，咪照顧下佢，等佢晚年可以有個人關心佢、陪下佢。

勞為財：（不夠其妹講）總之我就唔准你再同呢個阿婆有d咩來往。

勞善情：（大聲呼喊）人地只不過做過一次對唔住你o既事，你就唔原諒人，人誰無錯呢？婆婆都已經知道自己o既錯，仲內疚左咁耐，你不單至無動於衷，仲覺得懲罰唔夠，哥，點解你可以咁冷血架？

（勞為財靜了一會）

勞為財：是但你，你鍾意點就點（隨即轉身離開）

勞善情：（對老婆婆說）唔使理佢！

第五幕

時間：第三日

地點：生果店

（勞善情讓老婆婆於生果鋪內休養）

（辛婆婆無所事事，便幫忙打掃，這時勞為財剛回鋪看見）

辛婆婆：（有點害怕）老……老闆，善情佢唔放心我一個人住，留我係度休息，我好返就會即刻走架啦。

勞為財：（裝出冷淡的語氣）阿情叫你打掃架？

辛婆婆：無呀無呀！我見無野做，咪幫下手 l o r

勞為財：（依然一樣的態度）你咪以為幫我做下野就可以討好我呀

辛婆婆：唔係呀……

勞為財：我間鋪仲請得起人 o 既，我唔想白白受你恩惠呀，你做……做唔做？

辛婆婆：（喜悅的表情）你唔嫌我做野慢，我肯做，咩都肯做！

勞為財：得啦得啦，你係做得先好呀，唔得就唔好硬來，廢事一陣 d 人又話我虐待阿婆。一個月三千蚊人工，夠唔夠？

辛婆婆：（連忙鞠躬道謝）多謝你呀，老闆，多謝曬！

（一直站在店門側的勞善情看到，不禁泛起微笑）

～完～